

# INUIT ATAQATIGIIT

## INATSISARTUNI



UKA2015/38  
3. november 2015  
Iddimangiuu Bianco

**Kingusinnerpaamik UKA2016-imut atatillugu Kalaallit Nunaanni Inatsisartunut qinersisarneq pillugu inatsit nr. 9, 31. oktober 1996-meersumut, kiisalu Kommunalbestyrelsinut, Nunaqarfinni Aqutsisunut Ilagiillu Sinnisaannut qinersisarnerit pillugit inatsit nr. 7, 3. december 2012-meersoq pillugu Inatsisartut inatsisaannut allannguutissanik saqqummiussinissaannik Naalackersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tamakkiisumik Inatsisartunut aammalu kommunalbestyrelsinut, Nunaqarfinni Aqutsisunut Ilagiillu Sinnisaannut qinersisinnaanermut tamakkiisumik qinersisinnaanermut ukiorisat ullumikkut 18-iusut 16-inngortillugit.**

(Inuit Ataqatigiit Inatsisartunut ilaasortaataat)

Inuit Ataqatigiit inuusuttortatta 16-nilli ukioqarnerminnit demokratiimut toqqaannartumik peqataasinnaanissaminnut pisinnaatitaaffilernissaat pillugu siunnersuuteqarpugut inuusuttortavut 16-nit 18-nut ukiullit inuiaqatigiinni pissutsinik ilisimasaqarluarnerannik isummerfiginninnissaanerannillu upperinnilluinnaratta.

Inuusuttortavut tassaapput siunissami Nunatsinnik aqutsisuusussaasut, inuiaqatigiillu ilusissaannik aalajangeeqataanermikkut qanoq siunissami ineriartortitsiniarnerlutik isummersoqataasussat.

Inuusuttortatsituulli Inuit Ataqatigiit Nunatsinnut takorluugaqarlutalu anguniagaqarpugut. Soorlu ammaanersiorluta maani inersuarmi oqallinnitsinni oqaatigigipput isumaqarpugut meeqqat inuusuttullu aamma nunaminni pissutsinut naliliisinnaasut. Nunatsinni meeqqat 15-nik ukioqalernissami tungaanut meeqqat atuarfiini tunngaviusumik ilinniartittarpavut. Inuusuttuarangoreerlutik meeqqat atuarfiinit aningaangamik inuiaqatigiinni ingerlatsinermut ilisimasassat tunngaviusut ilisimalereertarpaat qanorluunniillu inuuniarnermikkut allatigut atugaqaraluartik taama ilinikkut ilisimasatigut naligiinnerpaamik inissimasarlutik.

Inuusuttut isummersorsinnaapput, aamma isummersortarput. Qinersisinnaatitaanermut siunnersuuterput pinngitsaaliissutaasussatut allanit nipeqartinniarnepoq. Erseqqissumik oqaatigissavarput; qinersisinnaatitaaneq pisinnaatitaaffiuvoq, inuup nammineq aalajangissavaa pisinnaatitaaffik taanna atorumanerlugu. Inuusuttortavut qinerseqataarusuttut Inuit Ataqatigiinnit tatigilluinnarpavut qaammaasartik isumartillu nammineq atorlugu qinersisassasut. Uagutsinnut pingaanerpaaq tassaangilaq kikkut qinissaneraat, tassaavoq tamat oqartussaaqataanerannut peqataanissaminnut periarfissaqassasut, Nunattalu siunissaanik ilusilersueqataanissaminnut periarfissineqassasut.

Ukiuni qulikkaani aggersuni inuiaqatigiinni innuttaasut ukioqqortussutsimikkut agguataarnerat malunnaatilimmik allanngortussaavoq. Utoqqaat amerlissapput inuusuttullu inersimasullu pilersuisussat ikilissallutik. Tamanna isumaginninnikkut allatigullu immini unammillernartortaqrpoq. Tamalli oqartussaaqataanerannut aamma unammillernartortaqrpoq. Inuusuttut qinersisinnaasut agguaqatigiissillugu innuttaasunut inersimanerusunut assersuullugit ikilisimassapput taamaammallu qinersinerni inuusuttut nipaateq qippiarunnaassalluni.

Oqimaaqatigiinnerusumik qinersinermi pisoqartassappat inuusuttut amerlanerusut politikkimik pisunik akuutitsisariaqarpugut, Inuit Ataqatigiinnilu isumaqarpugut 16-nik ukiullit qinersisinnaatitaalernissaat inuusuttut isumaannik inissaqartitsinermut akuunerulersitsinermullu aqutissaasinnaasoq.

Ukiuni kingullerni Inuit Ataqatigiinnit annertuumik siuttuuffigisatsinnik inuusuttut oqartussaaqataanerunissaannik isumassuivugut. Naalackersuisuutitaqarnitta kingulliup nalaani NAKUUSA pilersipparput nunattalu sineriaani tassuunalu inuusuttorpassuit oqartussaaqataanermik ilinniartinneqarput. Meeqqat Inuusuttullu Oqaaseqartartuat pilersinneqarpoq, Inuusuttut aamma immikkut saaffissaqartarnissaat pillugu.

Ilisimalluinnarparput assersuutigalugu meeqqat atuarfiini skolebestyrelseni inuusuttut ullumikkut peqataanerat annertoreersoq. Inuusuttut utaqqiinnarusunngillat. Peqataarusupput. Politikkikkut ingerlatsinissaq pillugu isummernerni aamma peqataanissaminnut periarfissitsigit.

Inuup qinereqataanermigut akisussaaqataanini aamma takutittarpar. Akisussaaqataanikkut inuiaqatigiinni kivitseqataaneq pinngortarpoq. Isumaqarpugut inuusuttut ajukkunnatik kivitseqataasinnaakutsoortut. Inuusuttortavut silassorissuupput, 16-nik ukioqaleraangamik inuunermi misilittakkanik ulikkaalereertarput allatigullu inuiaqatigiinnut tamakkiisumik peqataalereersimasarlutik.

Nalunngilarput partiit arlallit inuusuttunik pisinnaatitaaffiliinissatsinnut peqataajumangittut. Isummasi ataqqivagut. Neriuppugulli inuusuttortatta qinersisinnaanermut pisinnaatitaaffeqalernissaat pillugit sapiissusermik takutitsijumalerumaartusi. Alloriarnissaq pingaaruteqarpoq siunissatsinnimi kikkut kivitsisuussanersut nalunngilarput. Inuusuttortavut peqataatsigit. Tusarnaartigit. Pisinnaatitaaffiliinissamat tunuarsimaarnata alloriarta.

Neriuppugut siunnersuuterput oqallinnermik pisariaqavissutut isigisatsinnik pilersitsisimassasoq. Ilinniartoqarfinni, angerlarsimaffinni, inuusuttut akornanni innuttaasullu tamat akornanni. Tamat oqartussaaqataanerat ineriartortuartitassaavoq. Oqartussaaqataanerup ineriartortinneqarnera uninngisaannassaaq.

Partiit amerlanerussuteqartut siunnersuutitsinnik itigartitsisussaasut ilisimareeratsigu allannguutissatut siunnersuummik matumuuna saqqummiussissaagut neriulluta partiit siunnersuut ataatsimiititaliamut sukumiisumik misissuinissaq pillugu isumasioqatigiittoqarluarnissaalu pillugu ingerlatitseqqikkumaartut.

Allannguutissatut siunnersuuterput ima isikkoqarpoq:

**Siunnersuutigissavarput Naalackersuisut nassuiaasiornissaannik peqquneqassasut UPA 17-imi saqqummiunneqartussamik, tassani qulaajarneqarluni suut inuusuttut politikkikkut peqataaniarnerannut iluaqutaanersut imaluunniit akornutaanersut kiisalu nalilersorlugu sunik kinguneqarsinnaanersoq Kalaallit Nunaanni Inatsisartunut aammalu kommunalbestyrelsinut, Nunaqarfinni Aqutsisunut Ilagiillu Sinniisaannut qinersisinnaanermut tamakkiisumik qinersisinnaanermut ukiorisat ullumikkut 18-iusut 16-inngortillugit apparneqassappata. Nalunaarusiornermi siunertaassaaq inuusuttut politikkimut soqutiginninnerat peqataanerallu qanoq siunissami pitsaanerpaamik ilusilersorsinnaaneripput.**